




Tøj komp

24713


I Mag. St. Dr.


P





24713





Calendae

75*ant*

~~16763~~

1879. IV. 43.

Pastorius ab Hittenberg Joachimus:

Calendae Regiae in usq[ue]ffu Thosuatu[m] Jocu[m]  
nius Casimiri

1659

za Jana Kot.

No

3.

5957.

~~2539~~

~~79-~~

550  
⑥

Hist. 3539.

# CALENDÆ REGIÆ

Seu

De auspiciatissimo

SERENISSIMI AC POTENTISSIMI  
PRINCIPIS AC DOMINI

# DNI. JOANNIS

CASIMIRI,  
POLONIÆ & SVECIÆ REGIS

MAGNI DUCIS LITVANIÆ,

RUSSIÆ, PRUSSIÆ, MASOVIÆ, SA-  
MOGITIÆ &c. &c.

IN OBSESSUM A SE ET FELICITER  
RECUPERATUM

# THORUNIUM

Ingressu

IPSIS CALENDIS JANUARII  
ANNO M DC LIX.

Celebrato.

Intermixta alia complura ad presentem.

Bellorum Polonicorum statum pertinentia.

DANTISCI,

Sumptibus GEORGII FORSTERI, S. R. M. Bibliopol.  
ANNO M DC LIX.

Cum Privilegio S. R. M. Pol. & Sueciæ.



MAGNI. POLONIÆ. MARESCHAL.

LI. ET, CAMPIDUCTORIS.

SUMMI. DOMI. FORISQ; VIRI  
SPEI. PRIMIGENIAE.

INVENTIUMQUE. ORNAMENTORUM  
GENERIS. INDOLIS. VIRTUTIS. FORTUNÆ  
ATAVÆ. AVITÆ. PATERNÆ.  
MAXIMO. NATU. HÆREDI.

# STANISLAO

COMITI. IN. VVISNICZ. ET. JAROSLAVV.

LUBOMIRSKI.

S.R.I. PRINCIPI.

THEATRUM HOC

CERTANTIS. CUM. SEVERITATE. BELLICA.

CLEMENTIAE.

IN. QUO

SUB

SACRAE. MAJESTATIS.

REGIAE.

FASTIGIO. AUGUSTO. ET. INCOMPARABILI.

VIRTUS. INPRIMIS. PATERNA.

PRÆSENTI. NUPER. SPECTATA.

INFOSTERUM

ALACRI. ÆMULATIONIS. GRESSU. SEQUENDA.

ELUXIT.

DEVOTO. MANUS. PARNASSIAE. OBSEQUIO.

OFFERTUR.



Ui ad scribendum nullâ inge-  
nii fiduciâ, sed vel autoritate le-  
gitimâ, vel aliis non adspernan-  
dis impulsî causis accedunt: ii,  
quanto magis cætera sibi præ-  
sidia deesse intelligunt, tanto  
curiosius luculentum ac plau-  
sibile circumspicere argumentum solent, ut quâm  
in se non inveniunt gratiam, à rebus dicendis mu-  
tucentur. Neq; exercitati oratores facilè eloquen-  
tiæ suæ verecundiam ita prostituunt, ut temerè,  
nullamq; idoneam vel ansam vel materiam nacti,  
provolent in publicum, sed imò, quò cordatior eo-  
rum quisq; est, eò accuratiùs suæ dictionis sibi ali-  
isq; vult constare rationem. Etenim oratio, quæ  
solis verborum freta coloribus, rerum pondere, &  
utilitate amoëna non juvatur, facilè meritoq; ob-  
noxia est fastidio; nec quicquam citius vilescere  
cernimus, quâm facundiam sui securam, sui prodi-  
gam. Sed ea porrò, nisi in dilectu, explicatuq; re-  
rum magna adhibetur circumspectio, non modò

gratiā non init, verum scēpē etiā incurrit of-  
fensam: præsertim ubi de publicis dicendum est  
negotiis, arduis ut plurimū perspectu, tractatu  
lubricis, ipso etiā scēpe attactu nimisquām deli-  
catis. Adeòq; prout ipsa variam judiciorum ale-  
am subeunt, ita qui de iis publicè disferere susti-  
nent, quantumvis cautissimè agere videantur,  
vix tamen unquam æquas omnium frontes expe-  
riri, multò minus æquare spes ac vota possunt. Ni-  
mirum prout cujusq; in id, quod dicitur, affectus  
est animus, ita Spartam suam ornasse orator scrip-  
torve, ita parem imparemve argumento vim in-  
genii, judicii, eloquentiæ, ita & decentem veritatis  
curam judicatur attulisse. Istarum rerum cogi-  
tatio alium fortassis, antequam silentii securitatem  
dicendi consilio postponeret, in ancipiū delibera-  
ndi curâ, & quodam dubitationum quasi æquilibrio  
aliquandiu teneret suspensum. Cæterum ego, etsi  
ad scribendum minimè omnium præceps, & ju-  
dicii alieni haudquaquām profectò irreverens, jam  
tamen silere citra dēdignationem obsequii, aut se-  
quioris de rebus judicii suspicionem, non possum.

Quippe

## RE C U P E R A T U M

5

Quippe aut non digna laude credenda sunt, quæ his temporibus apud nos acta, publico famæ circumferunt ore, aut rebus laudem merentibus illaudabilis desidia nostra decus suum patietur esse. Eam notam quia vitare magis, quam deprecari consilium est, age de novissimis rerum nostrarum successibus, quantum vires ingenii ferunt, & quantum licet per adversa, quæ subinde adhuc interstrepunt, dicamus: præsertim quando ita volunt Patroni, quando dicendorum seges dignitasq; excitat, & ipsa deniq; anni tempestas impellit. Revertente enim ad nos magno illo lumenis primocondo Sole, Soli æterno, ejusq; in terris nostris Vicario sideri, hostiam gratiarum, hostiam laudum, qualis decet Christianos, mactare par est. Pasim jam homines sibi aliisq; de superatis anni prioris molestiis gratulatos vidimus, & in futurum nova prosperitatis voentes incrementa. Quod si autem comprecationes ejusmodi, bono & laudabili more, inter privatos percrebuerent, multo utiq; justius palatia Regum Principumq; iisdem circumsonant. In Principum enim salute

A 3

sita

## THORUNIUM

sita est populorum salus, nec meliore compendio  
vota pro Republ. universâ fundi possunt, quâm  
si pro bono Reipubl. rectore fundantur. Quomodo  
nus mirum est, si quæ mihi, sub hunc novi Anni  
reditum, pro Serenissimo Rege & Domino nostro,  
suspicio omniaq; animum implevere, ea, cum præ-  
fens, ut constitueram, non possum, absens quali-  
cunq; scriptionis conatu in publicum evolvam.  
Quando in primis singulari, & insolito quodam fa-  
torum dispositu, ita pulchre cecidit res ut eo ipso  
tempore Rex Serenissimus THORUNIUM tot  
mensibus obfessum victor sit ingressus, quo Sol pri-  
mum annui sui curriculi spatium ingreditur. Non  
potuit meliore exordio Princeps optimus annum  
auspicari, quâm istâ tam illustri victoriâ; neq; au-  
gustius lemma inscribere fastorum suorum fronti,  
quâm titulum occupatæ tam magnificæ Civitatis.  
Quid autem dico, occupatæ? Servatæ dicere de-  
bebam. At neq; hoc ad rei exprimendæ magni-  
tudinem sufficit: in integrum restitutæ dicere oportet.  
Occupavit Carthaginem Scipio Æmilia-  
nus, sed ut eam funditus deleret, Occupavit Co-  
rinth-

## RE C U P E R A T U M

7

rinthum Mummius, sed ut miserrimè direptam, præcinente publicè tubâ, dirueret, populumq; omnem venderet sub coronâ.

Alii alias urbes exitio destinatas, proximasve, eripuere periculo, immortalem inde nominis gloriam assecuti. Atq; olim ob unum etiam Civem servatum dari solebat corona Civica, coronarum omnium, ut Plinius major judicat, non pretio, sed honore clarissima. Quanto illustrius decus est, Civitatem totam, Civitatem magnam & celebrem, Civitatem in extremo discrimine positam servasse: quanto major gloria, tot numero Cives, eosq; asperrima quæq; expectantes, in gratiam suscepisse: de salute deniq; anxiis, libertatem, jura & decora omnia restituisse: Instupescit Orbis tantæ mansuetudinis prodigio; ipsaq; Civitas paulò ante ad armorum Regiorum fragorem attonita, nunc ad tam insolens beneficentia Regiæ specimen hæret admirabunda. Apud eos, qui acceperam eminus tantæ rei famam usitatâ judicorum trutina ponderant, laborat propè narrantium fides, & incredibilis his videtur lenitas, cuius rationem non capi-

capiunt. Alii longius quoq; progrediuntur, & rem, quæ consuetudinem captumq; publicum excessit, modum etiam excessisse judicant. Indigni clementiâ homines, qui tam Divinam virtutem cavillari malunt, quam vel candidis judiciis expenditure, vel reverente saltem silentio venerari. Sed illos, quorum animos aut res ista minus tangit, penetratve, aut aliena semper Virtus felicitasq; urit, suæ relinquamus ignorantiae nebulis, vel intemperiis malignitatis. Tibi ô THORUNIUM, memorabile profectò, & æternâ recordatione dignum hoc anni auspicium est. Nunquam felicius Tibi in isto Zodicai spacio Sol luxit, nunquam lætius rediit, quam nunc cum Clementissimo Rege JOANNE CASIMIRO. Nec quicquam profectò absconi dicere videbimus, si simplicem aliis, Tibi geminum Solem, maximo Tuo emolumento, rediisse dicemus. Ac sidereus sanè Sol, qui omnibus lucet, Tibi etiam lucere nunquam desiit, etsi tot calamitatibus obrutæ non tam gratum fortassis lumen eius fuit. Sed alterum Solēm tristis & niseranda Eclipsis eripuerat Tibi, forte ut ipso hoc inter-

## RECUPERATUM

9

interceptu tanto liquidiūs pateret, quām funesta sit  
absentia ejus, & ut redditum ejusdem tantō impen-  
siūs desiderares. Verum de Te, ô THORU-  
NIUM, erit paulò post illustrior dicendi locus: cū  
Sacræ Regiæ M̄tis. labores, quos in Te recuperan-  
dâ insumpsit, curatiūs memorabimus. Atq; eos  
quidem historico intexi peplo convenit: & inte-  
xentur scio ab illis, quorum id muneris est. Sed  
quæ æternitati scribuntur, tardiūs procedunt, ipsa  
intimæ veritatis inquisitione, quā Historia omnis  
velut animâ respirat, aliquam temporis postulante  
moram. Mihi interea primū animi fervorem, quo  
in hoc tam optato anni exordio incaluius, liberi-  
ore sermone, sine cuiusquam tamen injuriâ, fas e-  
rit effundere. Neq; derogabit Oratorium hoc  
præludium operi historico, cum ut aliis, ita nobis  
quoq; non obscurum sit, alio hīc, alio illic opus es-  
se & genere dicendi, & rerū tum delectu tū ordine,  
Porro autem è re esse arbitror, ad grande hoc re-  
cuperatæ Urbis, clementiæq; Regiæ decus deprædi-  
candum non ante accedere, quām alia DEI libaveri-  
mus beneficia, quæ Serenissimo Regi, & inclyto

B

Polo-

Poloniæ Regno, anno proximè elapso, & paullo  
ante contigerunt. Postrema enim hæc, quæ nunc  
attonitum tenent Orbem, dependent ex superiori-  
bus, quæ nisi præcessissent, cœtera non modo non  
intelligi, sed prorsùs nec sequi potuissent. Com-  
memoratis autem rebus anterioribus, apparebit  
tantò liquidius, quibus gradibus defervescere Nu-  
minis erga nos ira, hostiumq; retro ferri potentia;  
Poloniæ verò felicitas, quod præfiscini dixerim, sen-  
sim resflorescere cœperit. Eo ardenteribus usq;  
votis invocabitur supremum Numen, ut non tan-  
tum porrò nos vincere, sed victoriis etiam uti pri-  
us, quàm frui doceat: & inprimis, ut animos ad e-  
radicanda vitia, verissimas scilicet malorum, quibus  
flagellati sumus, radices, magis magisq; excitet, atq;  
inflammet: Quò tandem his suppressis, studia Vir-  
tutum, quibus felicitas Regnorum debetur, splen-  
didiùs efflorescere possint. Cæterum in memo-  
riam retrò actorum regredientibus haud altiūs  
jam narrationem nostram ordiri lubet, quàm ab  
illo temporum articulo, quo Dacica in regno nostro  
tempestas desæviit. Nunquam enim luculentius  
ultri-

## RE C U P E R A T U M

ii

ultricem DEI manum hostes nostrisensere. Nemo non intelligit, de Palatino Transylvaniæ Racocio me loqui. Quem meministis, nexibus illis, quibus jam olim terra ejus Regno nostro arctissime devincta fuit, posthabitatis, autoramentis præterea, quibus amicitiam opemq; ipsius studiosè in primis quæsivit, meruitq; Polonia, neglectis, non Dacos tantum suos, sed Valachos, Muldavos, Hungos, & quod maximi momenti erat, turbidissimos quosq; Cosacorum in Rempubl. hanc commovisse. Tot gentium robora trahenti facile fuit, in corpore semivivo. & non sanguinem tantum, sed jam pene animam vomente, agere aliquantis per pro libitu suo. Itaq; magnam Poloniæ partem licentissimè pervastavit ipsumq; Regni Caput Cracoviam insedit. Sed ut iniquissima ejus causa, ita vitrea fortuna fuit. Fracta est, cum splendere vix cœpisset. Postquam enim Rex Sueciæ abiisset, hunc imparem ejus socium exercitus Austriaeus magnitudinis suæ umbra illico terruit, noster vero, sub Ducum Regni, & Palatini Russiæ felicissimo regimine infestare, urgere, fundere, ac perse-

qui non destitit, illatas etiam Regno injurias in ipsa Transsylvania, Duce Magno Regni Mareschallo, ultus est non perfunctorie. Tandem miser a plerisq; illis populis, quos in perniciem Poloniæ atraxerat, desertus postquam Aquilas Polonicas nullâ fugæ celeritate effugere potuit, circumsefus, atq; ad incitas redactus, miserabili pactione vitam, & abeundi libertatem redemit. Atq; ita rediit quidem ipse in Patriam, sed pene inermis, & Polono magis, quam suo milite stipatus. Hic enim in Scythicas incidit manus, & quam Poloniæ intenterat, ipse in Tauricâ Chersoneso subiit servitutem. Quas deinde adhuc calamitates eidem Raccio, jam reduci, indignatio aulæ Ottomannicæ conciverit & ut principatu suo exutus, alienis jam viribus collapsam restaurare quærat fortunam, qui suis antehac amicissimò Regno, præter causam impensè gravis fuit, nolo nunc referre. Qui & hæc, quæ dixi, nullâ alieno infortunio insultandi libidine a me dicta esse, ultrò & fidem testans, profiteor. Miseret enim me potius Principis, quem prava consilia opulentissimâ pace, quâ ad invidiam usq;

usq; frui visus est, exuere. Ottomannici Imperii  
mentio, quam modò feci, revocat mihi in memo-  
riam terrorem, quo ista Orientis potentia, vere su-  
periori, cum nondum constaret, quem magnis il-  
lis belli apparatibus peteret, sollicitum habuit Re-  
gnum nostrum. Circumstrepebant fines no-  
stros ingentes vicinorum Bassarum exercitus, &  
constans volitabat fama, arma ista stringi in nos,  
qui ob exhaustas vires alienis conatibus maximè  
videremur opportuni. Neq; dubium sanè erat,  
in Aulâ Ottomannicâ ab hostibus nostris nullum  
non motum esse lapidem, qui ad nos opprimendos  
crederetur facere posse. Sed aliter rem direxit,  
qui corda Principum frænat flectitq; pro libitu suo.  
Ejus potente nutu evenit, ut quæ nobis minata  
videbatur tempestas, in proximas gentes, & eas  
inprimis, quæ paulo ante in hoc se Regnum vi im-  
mani infuderant, decumberet, pœnas veluti exi-  
gens eorum facinorum, quibus, dum nos flagella-  
rent, gravius ipsæ flagellum meruerant.

Turcis juncta, atq; obnoxia Tartarorum gens  
est, illorumq; adeò arbitrio hæc pacem, & bella ca-

pessit. Jam vetera eorum, & non annis, sed seculis multis continua adversum nos bella quis ignorat? At iudicem tamen postremis his temporibus, impensè in Regem, & Regnum nostrum benevoli, magnum profectò adminiculum rebus nostris labentibus dedere: mirè D'E rem adgubernante, ut adversum Christianos, cognatos, & nullâ injuria læsos Principes gens barbara gens olim perpetuò inimica, Regem nostrū sublevaret. Neq; enim tantum copiis identidem submissis terruit Poloniæ hostes, sed & apud aulam Ottomannicam cum curâ egit causam nostram, quodq; maxime omnium memorari meretur, Cosacos summo virium conniuncto adduxit, ut primùm manus abstinerent à Poloniâ, & deniq; novo obsequii nexu eidem illigaretur.

Nunc ordo temporis ad commemorandum aliud DEI beneficium me vocat, & id tanti quidem momenti, ut non minimam illi salutis suæ partem debere videatur Polonia. Loquor autem de Serenissimi Electoris Brandenburgici reconciliatione. Is Princeps uti virtutibus animi, & potentia inter paucos hodie nominandus est, ita cuicunq; se parti adjun-

adjungit, hūic ingens profecto, confessione omnium, pondus adjicit. Eo tempore, quo Poloniae nihil non, atq; etiam ipsa sibi adversabatur, transmarino autem hosti fortuna velut sacramento dixisse videbatur, idem Sereniss. Elector magno illo publicæ infelicitatis torrente eò quoq; tandem impulsus fuerat, ut quas primum infringere quæsiverat, partes hostiles, foederis deniq; nexu, & virium suarum accessu augeret. Ea societas quamdiu viguit, gravissimis sanè damnis ut Electori, ità Poloniae constituit. Mutuis enim iisq; longè atrocissimis incursionibus provinciæ affines vexabantur. Ictibus iisdem pulsabatur utriusq; Principis animus, miserans, ut probos populorum Pastores decet, subditorum suorum fortunam. Ac multis insuper aliis tum domesticis, tum externis stimulis ad redintegrandam cum Polonia necesitudinem accendebatur Elector, ipseq; etiam Serenissimus Rex, missis aliis, atq; aliis internunciis, sinum illi pristini affectus magno studio pandebat. Ac dudum is annuisset, (conscius loquor) nisi novus ex Transylvaniâ interyenisset obex. Eo lapide feliciter tandem

dem amoto, facilius Elector Serenissimus Regius & Cæsarianis hortatibus, quibus ad pacem cum Polonia stimulabatur, cessit. Cessit, & ejuratâ hostium nostrorum societate, ad pristinam amicitiam novis legibus, interposito utrinq; in congressu Bidgostiensi, sacramento rediit. Eo conciliatu dici non potest, quantum rebus, & Regni, & Electoris commodatum sit. Nam primum mutuae terrarum populationes illicò conquievère, Copiae verò, quæ adversus Electorem excubuerant, ductæ sunt aduersus hostem communem. Moscus reverentius mox Lithvaniam, Poloniāmq; tractandam sibi putavit, postquam ad Regem accessisse cognoverat eum Principem, cuius amicitiam sollicitè semper, multisq; legationibus coluerat. Cosfacis quoq; major Regni veneratio incessit, cum id brachio Electorali viderent subnixum. Quantum porrò, & quam benè ordinatum exercitum idem Princeps trahebat secūm? illum exercitum, cui magnam partem victoriæ Varsaviensis Sueciæ Rex debebat. Illos Duces, qui phalangem pedestrēm phalangi, tormenta tormentis, ignem igni aptis-

aptissimè nōrānt opponere. Perspexerat id toti-  
es hostis, eò jam magis animo attonitus hæsit, cum  
quos, in nupero rerum nostrarum orgasmo, pro se,  
contra Polonos stare viderat, eos postea pro Polo-  
nis contra se stare sentiret. Jam illud quanti mo-  
menti, quòd redintegrata hæc amicitia portus Ele-  
ctorales obstruxit hostibus, iisdemq; omne mari-  
timum in his oris commercium, omnemque adeò  
auxilii spem, & ipsa quodammodo spiracula inter-  
clusit. Ad hæc cum latissimè pateant ditiones E-  
lectorales, ex omnibus penè istis ad primum hostis  
clasicum, & multo magis deinceps ad magnum  
subito exsplendescētis fortunæ fulgur plurimi ac-  
currerant. Post compositionem avocati sunt isti,  
& divites illæ scaturigines, ex quibus militum co-  
piæ affluxerant hosti, obturatae, aut alio averſæ.  
Postremò quot quantosq; Principes, catena ista a-  
miciæ Electoralis traxit? Quam multi in Germa-  
maniâ utrāq; amiciūs æstimare cooperunt partes  
nostras, postquam pro illis pugnantem viderunt  
Principem, sanguinis, sacrorum, alioq; fœderum vin-  
culo ipsis arctè innexum? Ut exemplò mutavēre

nonnulli castra, nec committendum sibi putarunt,  
ut contra eos arma stringerent, cum quibus sua con-  
junxisset Elector? Tanti ponderis, tantiq; emolu-  
menti conciliatio, longo labore, & singulari dexte-  
ritati **VENCESLAI COMITIS DE-**  
**LESNO**, Episcopi tum Varmiensis, nunc  
Regni Poloniae **PRIMATIS DESI-**  
**GNATI** potissimum debetur, cui eodem in  
opere, cura perpetua Fratris **PALATINI POS-**  
**NANIENSIS**, sapientissimi, & de patriâ præcla-  
rissimè merentis Seuatoris, et si eminus, efficacissi-  
mè tamen, semper respondit. Autoritate porro  
publicâ, Illustrissimo Antistiti, magnus Thesaura-  
rius, idemque Campiductor Lithvaniæ **VIN-**  
**CENTIUS GOSIEVIUS** spectatissimi animi  
confiliiq; Senator, hoc innegotio, datus erat Colle-  
ga. Enimverò prægrande ad eandem rem mo-  
mentum attulit Augustissima **DOMUS AU-**  
**STRIACA**. Hæc jàm antè laboranti Polo-  
niae Regno validum submisserat Exercitum, ipso  
impulsa vicini periculi intuitu, multoq; maiorum  
Virorum indefesso labore jam dudum excitata,

postre-

postremò autem, ubi tempore res maturuerat, felicissimâ summi Viri BOGUSLAI COMITIS de LESNO, tum magni Thesaurarii, nunc Vice-Cancellarii operâ, ad belli societatem adducta. Ac fateri profectò oportet, rem maximi momenti tûm confectam, quia ipsa, quam novus ac tantæ molis Clypeus jaciebat, Umbra, et si postea non nullis apud nos minus grata, Transylvano tamen aliisq; hostibus nostris, multum formidabilis, & ut præsidio suo, sic ipso magnitudinis Austriacæ horrore impensè fuit damnosa. Sed altero non minus illustri beneficio idem Imperator Rempubl. hanc devinxit, cum, ut dicere cœpi, missò experrectissimi ingenii, & edecumatæ prudentiæ Legato, BARONE de LISOLA, Serenissimum Electorem, & Regi nostro, & sibi, & toti huic causæ conciliavit. Utriusque negotii gravitatem vel ipsa effetûs lentitudo abundè ostendit, & quæ intervenere obstacula, tam fuerunt grandia, atq; immania, ut non modo optatum diu sufflaminarint eventum, sed & spem ejus interdum prorsus interceperint. Mors præcipuè Imperatoris nonne scopulus ejus.

modi erat, cui illa negotiatio spes omnino nostra  
frustratura videbatur? Nonne enim ipse ille rerum  
transitus, per se semper miris, atque insperatis cona-  
tibus opportunus, novos hostibus animos, cœteris  
novos afferebat metus? Nonne & ipsum Serenissi-  
mum Electorem, aliosq; idem negotium volven-  
tes, cum adversæ partis machinamenta inspicerent,  
justa suspendebat sollicitudo, ac timor, ne à domo  
Regnatrice aberraret electio? Quod si cōtigisset, nec  
ipsa Domus illa, nec Elector tutum sibi putasset,  
novo se & res suas implicare bello. Sed qui in  
alto res mortalium dispensat, ita consilia Germa-  
niæ direxit, ut Septemvirale Collegium sumere  
Principem mallet, quam quærere. Hoc prætereà  
effecit, ut de publico Germanici Imperii consilio ad  
hostem mitterentur Legati, honestis conditionibus  
suasuri, ut ex finibus imperii arma is efferret. Nihil  
impetrarunt illi, & Holsatiæ, Jutiâque, provinciis  
Germaniæ, adeo hostis nō excescit ultrò, ut annis us  
sit potius æternū facere suas. Uno impetu potio-  
res Holsatiæ urbes opprimere instituit, eodemque  
tempore Serenissimum Daniæ Regem, factæ no-

vis.

## RECUPERATUM

21

vissimè paci fidentem, & jam penè inermem, calidissimo consilio, denuò invasit, ac omni propè Regno exuit. Intra unius Hafniæ fortitudinem stetit totius Regiæ Domûs, sceptrique Danici salis, quasi ostendere volentibus fatis, nullam esse tantam potentiam, nullam audaciam, quam virtus, ubi veris stimulis, & desperatione in primis incaluerit, cælo auspice, sistere non possit. Sttit acerrimum Regem una urbs, non tam vallorum circuitu tūm, quam fortium, & Regi suo fidorum pectorum oppositum unita, sed in primis protectore Deo, & Domini sui præsentia animosa. Sttit, inquam, Principem, quem non cætera Dania, usitatis nudata præsidiis, non hyems hosti nimium propitia, non flumina, non maria ipsa cohibuerant; exercitumque nihil non domare posse creditum, invictâ constantiâ à mœnibus suis prohibuit, ingens hactenus scopulus fortunæ hostilis, & illustrè in posterūm Deo volente habitura locum, inter Civitates, præclarâ erga Dominos suos fide celebres, quales sunt, ut alias nunc taceam, Aurelia, Metæ, Vienna, Praga, Lovanium, Brunna, Freiberga, Dantiscum, Zamosci-

C 3

um.

um. Neque passus est Deus periclitanti unà cum  
Rege suo Urbi deesse auxiliatores. Nam cum ter-  
râ ei succurri à Principibus amicis, quantumvis ni-  
hil intentatum relinquenter, non posset, mari clas-  
sis Batava subvenit, & per infestas freti Danici an-  
gustias, per obstantes undique hostium acerrimè  
pugnantium ignes manusque, cruentâ quidem,  
nec parvo emptâ, magnificâ tamen victoriâ opem  
intulit; non sine eximiâ & æternâ laude Thalassi-  
archi Baronis VVassenarii, qui ejusdem clasfis Pro-  
Præfectis VVittio, & Florisio superstes, non mi-  
nus fortiter, quam qui periérunt, sed magis feliciter  
dimicavit. Cæterum dum hæc aguntur, tota inte-  
rim commota Europa bello DanoPolonico magis  
magisq; intendit animos, & nullus penè Princeps,  
nulla provincia est, quæ hoc incendium ad se non  
putet pertinere. Quâ in re quomodo non reve-  
rentibus animis admireremur singularem Dei super  
Republ. nostrâ curam? quâ effectum videmus, ut  
causam nostram olim desertam, major tandem pars  
Orbis facto armorum consiliorumq; concursu, a-  
genda suscepit. Non est equidem pietatis no-  
træ,

stræ, latius se indies spargentibus belli flammis  
lætari; potius vero calamitatibus, quas Dania fœ-  
derata, & tot aliæ terræ gravissimas patiuntur, ita,  
ut par est, ingemiscimus, atque ut honestissimâ tan-  
dem pace tam fœda certamina componantur; &  
improbus bellandi amor exterminetur, animitus  
optamus. Attamen fateri necesse est, nobis mul-  
titudine hostium variorum obrutis, longè gravior-  
rem futurum fuisse hunc Regem, nisi alibi reperi-  
set, cui infringeret potentiam. Ubi vero tot po-  
puli in idem bellum conspirârunt, nostri interim  
Exercitus viam sibi stravere ad hostem ibi quæ-  
rendum, ubi multis abhinc seculis pedem Poloni  
non posuerant. Quas ô superi! vices habent res-  
mortalium! Nondum triennium effluxit, cum in-  
timis regni nostri visceribus incubaret hostis; illud-  
que velut belli spolium inter Duces suos distribue-  
re cogitaret. Brevi post excussum est cervicibus  
jugum, & surrexerunt Camilli, qui excitatâ veteri  
Sarmatarum virtute, vocatoque in libertatis vindici-  
cias fortissimo quoque, passim præter opinionem  
fatigavere invasores, & extremo virium conatu id-  
effe-

effecere, ut externæ potentiaz virus à mediis Poloniæ præcordiis, in extremos ejusdem margines ejicetur. Pauci tamen, in illo redeuntis fortunæ quasi crepusculo, tam amplæ spei erant, ut brevi fulsurum crederent diem, quo Polonia hostem in cubilibus ejus, Livoniâ, Pomeraniâ, posteà vero in ipsis Cimbrorum intimis recessibus vestigaret. Id tamen ecce fieri jam aut factum conspicit, miraturq; Orbis. Sensit non itadudum vim Sarmatiam Pomerania omnis, quæq; anteà hostis apud nos peccaverat, illa maximâ clade suâ expiavit, fortassis in posterum etiam expiare perget. Non sine stupore Germania, & Europa penè univisa audit, Aquilas nostras circumvolitare Cimbrici maris littora, ibiq;, præeunte fortissimo Stephano Czarnecio, Palatino Russiæ, cæterisq; Ductoribus, viris strenuissimis, summâ passim celeritate famam sui anteire, admirabili audaciâ magna, & aliis invia flumina, sine pontium beneficio, trajicere, incredibili alacritate difficillimas quasque belli operas sibi ultrò deposcere, maxima adire pericula, capere urbes munitas, insulas nando invadere, atq; occupare,

re, hostes passim fugare, sternere, persequi, præclaris denique ausis gentis suæ gloriam latissimè per orbem diffundere.

Sed jam tandem sermo ab extremis Balthici maris anfractibus ad Borysthenem, & ultimos Russiæ fines trajiciendus est. Non nescit orbis, primam inde tempestatem surrexisse Poloniæ, quâ ita concussa illa est, ut fessa denique & propè nuda patuerit aliorum vicinorum libidini. Atq; horum occulta quædam, & fortasse fatalis in nos conspiratio fuit. Certè, quò diutius hæc Respublica vapularet, singulis, Deo permittente, velut per manus tradita est flagellanda. Sed, ut innui modò prima virga, quâ castigati sumus, agrestis fuit, tantoq; adeò acerbior, quia famulâ manu infligebatur ingenuis, & in corpus cum adhuc integrum, delicatum & talium plagarum insolens, inciderat. Facilis cuiq; conjectura est, de Cosacis me loqui, genere hominum duro, laborum tolerante, libertatis, & ex in militiæ avido, Reipubl., cum ad bona se verit, præsidio egregio, cum secus, pestilentissimo veneno. Nam ut adversum Turcas, Tartaros, Mo-

schos, utilem subinde Regno præsttit operam, ita  
facilè semper, quoties aut robore suo placuit sibi,  
aut servitute displicuit, rebellavit, simulatq; inpri-  
mis caput reperit prouum, idoneumq; ad res no-  
vas. Novissime Chmelnicium repererat, homi-  
nem à teneris innutritum militiæ, nec literarum  
rudem, aulæ vero nostræ, & imbecillitatum publi-  
carum, plus quām expediebat nobis, gnarum. Is  
cum lite privatâ partem agri amisisset, daimni &  
contumeliaz impatiens, provocavit ad arma, & col-  
lectâ primūm intra scopulos Borysthenis exiguâ  
sui similiūm manu, mox Scythes vicinos allexit, e-  
orumq; ministerio excubitores Regni exercitus,  
cum quicquid ibi Cosacici sanguinis sub signis Po-  
lonis militaret, corrupisset, repente circumvenit,  
floremq; adeo militiæ Polonæ aut cecidit, aut unâ  
cum Ducibus in Tauricam misit. Dein, cum durante  
Interregno pro libitu scrutatus esset matris Reipub.  
viscera, tandem exsplendescente novi Regis Ma-  
jestate flecti se passus est, ut fortunæ suæ modera-  
retur. Sed quoties postea sensit, lacertos denuo  
Poloniā mouere, vim illico aut repulit, aut præ-  
venit.

venit. Fusus aliquando, sed multitudine astuq;  
sæpius prævaluit. Pactis identidem Reipublicæ  
conciliatus, sed nunquam fidens, & in ipsâ semi-  
per quiete inquies, animos suorum perpetuò  
adversum Poloniam tenuit armatos, atq; externa  
insuper foedera, quibus potentiam suam muni-  
ret, circumspexit. Hæc porrò ipsa, prout re-  
bus suis expedire videbatur, mutabat. Nam  
cum Tartari, quorum viribus ante surrexerat, in  
gratiā cum Rege & Regno nostro rediissent, ille  
uni eidemque cum nostris parieti inniti nolens,  
ad Mosci patrocinium confugit, ejusq; potestati Ki-  
oviam, aliaq; præcipua illius Russiæ oppida tradi-  
dit, in precium scilicet tutelæ, & fidei autoramen-  
tum. Atq; istâ tanti exercitus, & tot munimen-  
torum accessione animatus Moschus, eò profundi-  
us ungues barbaros in Lituaniæ præcordia immi-  
sit. Postea equidem subito emicans potentiae  
Suecicæ fulgor sumpta in nos arma Moscorum sti-  
tit aliquandiu; nihilominus pars Cosacorum, con-  
nivente Chmelnicio, stimulantibusq; occultè aliis,  
Racocii Transylvaniæ Palatini adversum nos ro-

bur auxit, eoq; Duce, Poloniā fœdissimè devastavit. Ita homo ille, utcunq; simularet amicitiam, per abdita, & magis fida ad hostes inclinans, occasionem nullam nervos Polonorum incidendi prætermittebat. Ac à Moschici quidem Dominatus nexu haud temerè unquam is recessurus videbatur, quia abjectâ solidæ cum Republ. conciliatio-  
nis fiduciâ, sacramento se obstrinxerat Despotæ illi, neq; aliud firmius contra Tartaros æquè ac Polo-  
nos præsidium reperire se posse putabat. Unde  
vix spei quicquam supererat, vivo illo, Cosacos ad  
obsequium Poloniæ reddituros. DEO autem, ut  
ex eventu didicimus, placuit restituere eos Reipu-  
blicæ, à quâ malo fato erant avulsi. Itaq; obices  
omnes amovere oportuit, & in illis ipsum quoq;  
Bogdanum Chmelnicum, quo sublatō in diversa  
quidem ivere Cosaci, potior tamen pars, Du-  
ctore V I H O V I O , intimorum defuncti  
Chmelnicii Ducis consiliorum socio, Tartaris  
præcipue instigantibus, in Poloniā reflectere  
cœpit animos. Nec præbenti se fortunæ defuit  
utraq; Majestas Regia: sed per viros gravissimos

prudentissimosq; quorum princeps STANISLA-  
US CASIMIRUS BINEVIUS, Castellanus  
VVolhiniæ fuit, surgentem in illis bonæ erga  
Rempubl. propensionis affectum, solicite aluit, fo-  
vitq;. Interim verò, re magis magisq; in dies ma-  
turescente, optimi, & sincerissimi quiq; Cosaci Mo-  
schicæ servitutis jugum quatere, atque excutere  
incipiunt : confestim etiam alios sibi adversos,  
Duce VIHOVIO, armis aggrediuntur,  
& ope Scythicâ subnixi, profligant, ipsum  
vero Ductorem, Puskarencum nomine, palo  
fusfigunt, ostentui cœteris, qui Moschici regi-  
minis pertinaces, libertatem oppugnare, quam  
defendere malleant. His certaminibus illi,  
quò magis apud Moschum spem sibi veniæ præci-  
disse viderentur, eò alacriùs aures præbuerunt Re-  
giæ clementiæ promissis. Tandemq; annitenti-  
bus utrinque delegatis, in certa capita, quibus illos  
in unum secum corpus coalescere Respubl voluit,  
conventum est: missiq; ad Serenissimum Regem,  
apud Thorunium, in Castris, tūm agentem, inter-  
nuncii, qui VIHOVII, & cœteri exercitus Zapo-  
roví-

roviani nomine, sacramentum Majestati Regiae, & Reipubl. dixerunt. Magno equidem conatu, magno etiam rerum, quas Respubl. pro carissimis habuit, impendio, nec libertatis tantum, sed sumorum decorum suorum communicatione constitit ista conciliatio. Sed fructuum, quos eadem illa nobis promittit, ubertas solatur & pensat omnem precii magnitudinem. Ego nunc emolumenta ejus pacificationis omnia recensere hic nolo. Hoc tantum addo, quod in confessu apud omnes temporum callidos est, magnum eo nomine beneficium DEO Polonię debere: eumque porro orandum, ut tanto muneri addat perennitatem, atque initia conjunctionis nodum fortius indies adducat.

Tandem vero jam ad Te, THORUNIUM, redeo, quia, ut sermonis initium fuisti, sic eiusdem Te finem esse volo: ita tamen dictionem temperare meditans, ut minime fortunae Tuæ insultare, sed potius de tam miti malorum Tuorum termino videar Tibi gratulari. Non enim lubet, nec decet acerbitate verborum gravem esse illis, quibus vixit Rex tam yoluit esse propitius. Quan-

quam

quam tristioribus nonnullorum geniis, & nodum  
in scirpo quærentibus, nulla fortassis orationis mol-  
dices satisfaciet. Tales enim vel levissimi attactûs  
umbrâ ac suspicione vulnerantur, & sub quovis e-  
tiam balsamo causticum metuunt.

Evidem Tibi, ô pulcherrima Vrbium, anti-  
quitas Tua, tum continua in Poloniam fides, jam  
olim inter primas Borussiæ civitates Principem lo-  
cum dedit. Tibi Legum, juriumq; suorum Ar-  
chivum credidit Borussia. Tu Paciolum Sarmati-  
ticum Istudam, cum Borussiam ingreditur, prima o-  
mnium excipiss; Tu ubertate illius, totq; adeò fera-  
cis Poloniæ muneribus prima lætaris. Te & vici-  
nia ipsa & linguæ communio, & commerciorum  
propior usus præ aliis Regno arctissimè innexuit.  
Certe, quām indissolubili necessitudine illi injuncta  
hæreres, ipsa satis palam fecisti, cum priore bello  
Suecico, audaces VVrangelii impetus, & inopina-  
tō mœnibus imminentem vim invictâ fortitudine  
repulisti, eo nomine & apud Polonus summam  
gratiam, & domi facundissimos præcones, & de-  
niq; apud posteritatem immortale nominis decus  
ade-

## MTHORUNIUM

32

adepta. Novissimâ hâc rerum vertigine, tempe-  
stas publica communi Te cum aliis multis naufra-  
gio implicuit. Evidem prodigionis labe intactam  
Te, & cum hoste, antequam ei subesses, nunquam  
consilia sociasse scimus. Potius vero iniisse Te fa-  
temur rationes, quibus viam illius à mœnibus Tuis  
quam longissimè arceres. Cæterum postquā idem,  
prolabentibus ad obsequium ejus & exercitibus,  
& Provinciis, ipsaq; Regni metropoli, in Prussiam  
rediret, fortuna venientis ita Te attonuit, ita etiam  
juncta fortunæ suada se infudit animo Tuo, ut ma-  
ximæ imprudentiæ esse crederes, portas claudere  
illi, cui nemo putabatur clausisse, aut clausurus esse.  
Admisisti igitur Dominum novum, & cum eo nu-  
merosum præsidium, novum scilicet cum novo  
Domino capistrum. Prorsusq; ita alterius esse  
cœpisti, ut propè desineres esse tua. Quantum-  
vis enim lene admodum videretur, cui humeros  
submittebas, dominium, tale tamen erat, ut id tuo  
arbitrio exuti non posset, alieno semper posset in-  
tendi. Ac sub novâ hac potestate defluxere Tibi  
tres propemodùm anni, ægrius nimirum lentiusq;  
ex

## RECUPERATUM

33

ex fluctibus suis emergente Poloniā, quam ut Tibi  
illico manum posset porrigerere. Post Cracoviam  
recuperatam destinatus equidem in Tui vindicias  
tendere cœpit exercitus. Sed is hiemis viciniam, &  
nescio quæ alia obstacula causatus, non multò post,  
cum Duce annis fesso ante hyemem ingressus est  
hyberna. Pars tamen equitatus Polonici, Ductore  
**JOHANNE SAPIEHA**, exercituum Regni  
Commislariori generali, eminùs circumcidere Te  
cœpit, Tibiq; commeatum; & cum reliquis hosti-  
um præsidiis commercium intercludere conata est.  
Ubi velitationibus creberrimis commissi utrinque  
excursores, multo subinde cruore campum resper-  
sere. Perpetuoque cum præsidio Tuo pugnavit  
magnanimus Sapieha, donec in suburbii Tuis  
confisteret. Supervenière posteà sub regimine  
Generalis excubiarum Magistri **SUCHII**, viri  
militari laude præclarissimi, Austriacæ aliquot le-  
giones.

Quæ fortiter circa Te figere pedem, & pedi-  
tatu suo aggeres struere, tandemq; machinis admo-  
tis opera hostium & Tua verberare cœperunt.

E

Cre.

## THORUNIUM

Crevit indies obfessor exercitus, quia & illæ copiæ  
Austriacæ, quæ in Varmensi Episcopatu hyema-  
verant, accessere, Ducis sui HESTERI inopinatâ  
captivitate nuper tristes, mox redditu ejusdem tan-  
tò lætiores, quia is astu astum pulchrè ultus, è carcere  
Mariæburgensi feliciter evaserat. Accesit quoque  
**CHRISTOPHORUS GRODZICUS** Ge-  
neralis rei armamentariæ per Poloniam Magister,  
idemque meritissimus Regni Senator, qui oppida  
Vistulæ adsita, & quicquid hâc parte hostilibus ra-  
pinis patuisset, legionibus suis strenuè hactenùs pro-  
pugnârat. Ita omni ex parte denique cincta Urbs  
fuit, & hostis intra mœnia, parvamq; insulam, in  
medio Vistulâ sitam, conclusus. Interim verò  
non defuit ille sibi, captans subinde, atq; aperiens  
etiam sibi occasiones erumpendi. Præcipue au-  
tem copias Austriacas assiduis, & insidiis & aggres-  
sionibus solicitabat. In has enim & præsidiarii, &  
cives ipsi singulari quodam ferebantur odio. Quia  
nimirum animis infederat opinio, urbem obfessam, si  
quandò ad deditioñem veniendum foret, non vete-  
ris Domini, sed Austriacum regimen subituram.

Quod

Quod ut externum , & religioni suæ formidolosum populus omnis mirificè abhorrebat. Bilotvium porro , cui Civitatis defensio commissa erat, super insitam indolem , acrem , cautamque & prorsus ad ardua comparatam , famæ suæ cura stimulabat , ut summâ vigilantiâ & contentione ageret , quæ Virum nobilem , veterem militiæ , ejusmodi obsidia sæpius cum laude expertum , Generalis deniq; excubiarum Magistri munere præditum decerent . Dabat itaq; sollicitè operā , ut in Urbe quam ordinatissimè omnia procederent . Cives advenasq; (quorum sanè plurimi ex proximis agris confluxerant , ipsâ rei familiaris jacturâ in populatores nostros mirificè exacerbati ) non modo ad obsidionis toleratiā , sed ad arma etiam gerenda firmabat . Intus benevolentiam , quantum posset , servans sibi , extra obfessoribus noctu diuq; nocere quærens , eruptionibus potissimum , quas ita frequentavit , ut qui omnes illas ab initio ad finem annotarunt , plusquam trecentas nobis annumerent . Cæterum his opera equidem nostrorum multum subinde turbata , & ipse peditatus , auxiliaris præsertim , non

leviter labefactatus ; Sed non minus præsidiario-  
rum quoq; numerus accisus est. Ac tametsi hostis  
identidem aliquos ex nostris caperet cœderetvè ,  
nunquam tamen eò profecit, ut ullum vel militem  
auxiliarem à suis , vel commeatum unquām reci-  
peret. Nostri enim vias, quibus subsidia ventura  
credebantur , excurrentibus longè latèq; turmis e-  
questribus, undiquaq; obsepterant ; & ut ipsi lar-  
giore rerum necessiarum copiâ fruerentur, stra-  
to ponte junxerant utramq; Vistulæ ripam. Sed  
hostis munitionum suarum robore,tum suppeditente  
victûs necessarii sat ubere usq; copiâ fretus, haud  
quicquam adhuc submittebat animos. Prorsusque  
adeò major vis ad cicurandam ejus audaciam vide-  
batur requiri. Merito hîc mirum miserumque  
rerum humanarum genus agnoscimus; quarum  
adeò remedia longè tardiora sunt , quam mala.  
Morbi repente subinde ingruunt, ac si fatalis hora  
adest, repente etiam occidunt. Ut vero curen-  
tur, mensibus opus est, aliquando & annis. Non  
unius præterea Medici industriam fatigant, multas  
pyxides Pharmacopæorum deplent, & ut ægrotan-  
tan-

tantum corpora, sic crumenas eorundem, aut iis proximorum exhauriunt. Ægrotabas Tu quoq; Thorunum, & repentinus quidem, sed idem gravissimus æstus præter opinionem Te Poloniæ & Tibi ipsi eripuerat. Utinam prior valetudo æquè citò redonari ægræ potuisset, quâ erat erepta. Sed lentè processit restitutio Tui. Iterum quasi parere Te sibi Polonia debuit; & ut feliciter pareret, plusquam novimestre tædium coacta est ferre. Tulit æstivi solis ignes, tulit autumni nimbos & procellas, tulit brumæ rigores, tulit mille molestias ac incommoda, ut Te ægritudine Tuâ, à quâ possebaris, liberaret. Nec cessisset forsan usq; illa, nisi præsentem Regiæ Majestatis vim sensisset. Prævisum id mature à Rege ipso, & Regni ordinibus, adeoque omnium consensu sancitum est, ut ægri istius restitutioni Rex, non autoritatis tantum auspicia, sed & manus suæ ductum commodaret.

Nec cunctatus SERENISSIMUS REX, simul ut comitorum laboribus defunctus esset, abiit in castra, comitante SERENISSIMA REGINA; utroq; Regni CANCELLARIO,

& aliis Proceribus. Sed venit quoq; in primis alter exercituum Polonicorum Dux, idemque Regni Mareschallus **GEORGIVS LUBOMIERSCIUS S.R.J.** Princeps, Comes de Vysnice, accelerando cœptæ obsidionis operi, summâ illa autoritate, quam immensis virtutibus, maximisque in patriam meritis, dudum sibi comparavit, ingens datus robur ac pondus. Qui jam etiam magnam exercitûs sui partem, florem militiæ nostræ, eōdem præmiserat. Tum verò validissimè demùm fervere cœpit obsidio, tot nimirum diversorum nominum, populorumq; legionibus, nobili virtutis æmulatione, in hostem certatim undiq; pugnantibus. Excitati jam ante erant nonnulli suggestus, de quibus in urbem non infelicitate quotidie fulminabatur. Ne inferiores cœteris esissent, qui post coeteros venerant, excitarunt & ipsi suos, quo nullâ parte quies esset obsessis. Qui vicissim noctu diuq; aut eminùs jaculando respondebant nostris, aut cominus factâ excursione instabant. Etsi autem cruenta hæc certamina creberent, neque obsessi ulla melioris inclinationis

præ-

præberent indicia, Rex tamen Serenissimus, ut ab initio altera manu arma pertinacibus, altera clementiam resipiscentibus ostentaverat, ita subinde adhuc scriptis per NICOLAUM PRASMOVIVM EPISCOPVM LVCEORIENSEM & MAGNUM REGNI CANCELLARIVM literis æquissimam pacem omnibus offerebat. Nimirum tibi, Christianissime Princeps, prius, & antiquius erat, Temet vincere, quam hostem, & minus fortitudini permittere, ut minus sanguinis funderetur. Parcere volebas, ut Tuis, et si Tui esse desiissent, & abscissa membra integra malebas corpori reddere, quam delere, dum & ipsa modo reddi corpori, quam deleri mallēt. Sed qui rerum in urbe potiebantur, hostes, nō minus ad verba clementiae quam ad ictus telorum occalluerant, seu spe auxiliis sustentantes, seu inania gloriæ tum suæ, tum civium præponentes saluti. Cives autem potestatem sui amiserant. Ad portum salutis & libertatem adspirare apertè, erat res plena periculi. Multi itaque nubilis mentibus serenos in duebant vultus, ut præsentibus rebus contenti viderentur.

quas

qua stacito voto mutatas volebant. Sed erant quoque in numero obfessorum aliqui, novo dominio eō usq; addicti, ut non nisi ferro ab eo divelli posse viserentur. Quos adeo clementia Regia non moliebat, sed obdurabat. Nolebant agnoscere malorum suorum sanatricem manum, quia non agnoscabant morbum, & patientiam præbere remediis recusabant, quia quod remedium erat, morbum putabant. Cœterū ubi Regia Majestas benignitate nihil profici vidit, cedendum denique putavit bellatorum legibus, quæ quidvis permittunt in hostem cedere nolentem.

Machinis itaq;, quæ ad vim majorem à nobilissimo ac solertissimo Archimede Regio GÖDKANTIO magnâ & hactenus inauditâ artis Pyrotechnicæ industriâ, comparatæ erant, saxa & tela ignea tandem immitti placuit in urbem. Juxta vero omnem exercitum ad faciendum undiquaq; insultum præstò adesse jussérat magnus Mareschalcus. Neq; longis hortationibus invitandus, aut erigendus erat miles. Jamdudum is operosis precebus aggressionem ejusmodi ambiverat. Multos

tos opulentæ spes prædæ incendebat. Alii genero-  
siores stimulis gloriæ agitabantur, & indecoram  
suæ genti tantam apud unam urbem existimantes  
moram, majore severitate aggrediundos suadebant,  
qui lenitate hactenus abuti viderentur. Plurimis  
etiam ingruentia hyemis incommoda lentæ obsi-  
dionis tedium moverant. Magno itaq; labore,  
multisq; argumentis hactenus expugnandus fuerat  
miles, ne tanto & suo, & Vrbis periculo, violen-  
tam oppugnationem præcipitaret. Eoq; gratius  
jam fuit Regiæ Majestatis de urbe adoriendâ decre-  
tum. Erat decima septima dies Novebris, cum  
tempestas ignea sævire, cumq; pariter exercitus ob-  
sessor incredibili impetu in propugnacula mœnium  
undiquaq; ruere cœpit. Urbs universa subito col-  
luxit, ac si undiq; obrecta flammis esset, eademque  
inter irruentia undiq; fulmina tota contremuit, non  
secus ac si atrocissimo terræ motu concuteretur.  
Sed quas stationes quæq; legio, & quo eventu oppu-  
gnarit, quæ damna in Urbe ignes lapidesq; mola-  
res injecti dederint, historia deinceps plenius expo-  
net; unicuique etiam Bellatorum decus suum, ex

fide & merito repensura. Nunc levi mentione illud duntaxat propugnaculum tango, in quo præcipuum operæ pretium oppugnatores fecerè. Magnus ipse Mareschallus adortus illud erat, eā in primis legione, cui Ductorem GIZAM, spectatissimum militiæ Tribunum præfecerat. Egregiāq; Ductorū ac militum virtute ibi pugnatum est, ac multi ab hoste tum sauciati, non pauci etiam cæsi fuere. Adeo ut pene hærere animi inciperent, an continuanda esset aggressio, quæ jacturam militum Ductorumq; exiguo hactenùs fructu pensaret. Sed Mareschallus cedere nescius iteratis hortaminibus, missōq; subsidio novum ardorem injecit suis; adeò, ut hi deniq; omnes acerrimo impetu connisi hostem propugnaculo ejicerent, in quo ille plurimum spei reposuerat. Pariter aliis nonnullis stationibus, tum hoc ipso tempore, tum post breve intervallum, feliciter res gesta est, ita ut nostri intra paucos dies, aliquot hostium munimenta occuparent, inq; ipsis adeò mœnibus figerent pedem. Sensit hostis exercitui nostro non modò ad pugnandum satis animorum (hos enim jamdudum campis patentibus,

&amp; ubi

& ubi manibus res gerenda fuit, expertus erat) sed ad expugnandas etiam munitiones satis jam esse industriae. Itaque remittere tandem paulatim coepit animos, idque eodem magis, quod facile conjiceret, Polonus nullam haec tenus vi adversa, nulla coeli inclemensiam, ab incepta obsidione avocatos, nunc tantis successibus animosos, eodem alacrius operi ad finem jam precipitanti incubituros. In urbe contraria praesidiariorum numerus, tum vi nostrorum, tum novis morborum generibus, magis magisque atterebatur. Nescio quae enim Sceletyrbe, lentem alioquin homines confidere solens, hic prater morem rapida, in necem subitam agebat milites. Ita ut denique vix trecenti incolumes & ad pugnandum idonei superessent. Eodem magis consternati etiam cives, faciliores jam aures praebabant prudentibus, qui præveniendam esse necessitatem ultimam sentiebant. Serenissimus vero Rex etsi ad iterandam agressionem generalem omnia haberet parata, & præterea multis precibus, atque etiam quiritationibus militum usque sollicitaretur, ut vi militari urbem expugnari sineret, suæ tamen benignitati magis, quam

votis aliorum obsecutus, denuò per literas hortatur  
obsessos ( et si nemo inde quicquam benevolen-  
tiæ ostenderet ) ne porro fatum , iramq; in se Re-  
giam inani pertinaciâ lacesterent . Capiti in primis  
præsidiariorum non obscurè ob oculos ponit ; quid  
expectandum haberet, si urbem tam nobilè suæ po-  
tius obstinationis victimam , quām Regiæ clemen-  
tiæ fieri vellet exemplum . Cum interista , Urbis  
simul inænia tormentis majoribus arietarentur , à  
terrore ipso vim eò efficaciorem habuere literæ  
Regiæ . Proindeq; colloquia de transactione pri-  
mùm per TRABVCVM R.M.Secretarium, po-  
stea inter præcipua utriusq; partis Capita habericœ-  
perunt , & cum nulla transactio aut fieri , aut vale-  
re posset , nisi quæ Generalissimi Suecorum in  
Prussiâ Gubernatoris consensu niteretur , datum  
est obsessis armistitium , spatiūq; & potestas mit-  
tendi Mariæburgum . Postquam rediissent , qui mis-  
si erant , & jam jam violentiæ militari lenitas Re-  
gia , nisi festinata transactio præveniret , cessura vi-  
deretur venerunt ex urbe faciales , qui cum VIRIS  
ILL. ANDREA MORSTINIO Regni Refe-  
renda-

rendario, VLADISLAO REY, Sere-  
nissimæ Reginæ Cancellario, & BARTHOL-  
DO à Rautenfels/Regiæ Maj. Secretario, con-  
gressi, in eas cum Rege Serenissimo leges conve-  
nere, quas an unquam spe conceperint, nescio, ac-  
cipere quidem vix ab ullo alio, quam ab ipsa Cle-  
mentiâ potuerunt. Apud exteris sanè gentes fi-  
dein propè excedit, hostem, qui nihil unquam eo-  
rum, quæ summa Martis sævities committere so-  
let, omiserit; qui toto propè anno eminus comi-  
nusq; circumjectos exercitus nostros exercuerit,  
ipsam Regiam Majestatem utramq; sub Jove fri-  
gido, & variis cœli injuriis tamdiu detinuerit, tan-  
dem imminentibus jam omnibus extremis, tam æ-  
quis tamen, tamq; optabilibus conditionibus, Vr-  
be egressum esse. Sed nimirum Serenissimus  
Rex noster minimè unquam sitiens sanguinis hu-  
mani, victorias suas eò majores putat, quo magis  
sunt incruentæ: & gloriæ sibi ducit, hostem armis  
quidem, sed simul & mansuetudine superasse. Ar-  
mis quippe viciisse, felicitatis sœpe laus est, igno-  
uisse victis, solius decus est virtutis. Inter præcipuas

porrò clementiæ istius causas, Vrbs ipsa erat. Potius enim Regia Majestas præsidium cum Vrbem servari, quam Vrbem cum præsidio perire voluit. Periisset autem hæc, & nimirū in sanguine Civium, matronarum, infantum natasset, si furentis vindictâ militis permissa fuisset libidini. Nec ignota erat hosti Regia lenitas, quæq; animo federat, servandæ Vrbis sententia. Hoc itaq; Regis consilio, optimo sane, & maxime commendabili, in rem ille suam usurus, urbem tam arctè amplexus est, ut interire ipse non posset, nisi per latus civium, modumq; invenit, quo Vrbis oblessæ incolumitatem faceret pretium honoræ pacis. Nimirum cum aliud jam, quod opponeret, non inventaret hostis, Te Tibi, Rex Serenissime, opposuit: & cum elabendi nulla via esset, in Naturæ Tuæ genio ostium salutis reperit. Instabat illi vel mortis, vel abjectæ pactionis necessitas: Sed novâ arte Tibi per Temetipsum necessitatem intulit honestæ dimissionis. Alphonsus Arragoniæ Rex, clementiæ Tibi simillimus, dixisse olim fertur, nullâ rem agis adversariorum animos flecti, & conciliari

liari solere, quām placabilitatis, & mansuetudinis nomine. Quod dixit, expertus erat, ac cum multos inimicos habuerit, multos solā lenitate superavit, & amicos sibi fecit. Utinam æquē felix Tua clemencia sit, & quos perdere in Urbe hostes noluisti, cum posses, eos admiratio virtutis Tuæ emendet, non effugituros alioqui vindicem Nemesin, si pertinaciæ fomentum esse patientur, quod correctionis debet esse incitamentum. Faceant vero hinc illi, qui nihil in Regibus nisi solam armorum gloriam admirantur, verum autem fortitudinis nec modum, nec finem nōrunt : rati scilicet moderationem duntaxat succumbentibus esse propriam. Nec Clementiam nisi parvarum mentium virtutem ducent; ignari, Deum ipsum non minus optimum dici, quām maximum ; nec magis Domini, quam Patris nomine honorari. Ad D E V M porro homines nullâ re propius quām benignitate accedere posse.

— — — *Nam cum vincamur in omni  
Munere, sola Deos æquat clementia nobis.*

Illa autem gratia, quā urbem complexus es,  
Rex

Rex Serenissime, quibus præconiis efferenda est;  
& quæ eloquentia dignè illam extolleat? Primum  
enim quantæ benignitatis est, quod salvam esse  
eam voluisti, quam aliorum Tui dissimilium Re-  
gum asper genius dudum fortassis ad exitium da-  
mnasset. Causam ejus Tu apud Te, benignus  
idem Patronus & Judex æquissimus egisti: ream-  
q; non à supplicio tantum, sed à crimine etiam ab-  
solvisti. Quicquid peccatum videbatur, nulli  
dolo malo, sed sinisterati temporum tribuit æ-  
quitas Tua, & quicquid displicuit, non ut macula  
indignationem merens, sed ut vulnus miseratione  
dignum, fidei & constantiæ prioris memoriâ ab-  
sterrsum est. Meminimus, ferventibus extremi  
hujus belli initii, audire nos ex Te, Rex Serenissime, in tantâ lapsorum multitudine Te aliis jam-  
dudum ultrò ac lubenter ignovisse, aliorum casti-  
gationem D E O delegasse: Solum illum optimè  
& dignoscere, & ulcisci posse, quantum quisq;  
deliquerit: nec paucos eorum, qui in Te pecca-  
rint, Te etiam quiescente, castigatos. Et de  
ipsâ hâc Urbe sateri sanè oportet, illi transitum ad

ho-

hostes, et si haud spontaneum, certè haud quæsumum, magno admodum constitisse. Tot enim mala, & ærumnas passa, tot fatigata laboribus belli, tot affecta damnis, tot deniq; ictibus lacerata est, ut porrò à Te non nisi per vulnera ipsa percuti, & nihil penè amplius, quām spiritum amittere posset. Cepit Te calamitatum ejus miseratio, & cum ab initio obsidii, Civibus impunitatem spoondisles, posteà etiā, et si justam mutandi caussam habere videreris, non mutasti propositum: fidei scilicet datæ constantiam & autoritatem obtendens. Nimirum, quia nullâ re magis, quām clementiâ gaudes, facile, & ultrò suscipis vincula, quibus ad eam obstringaris, & nodos fidei, quos alii nullo negotio rumperent, Tibi benignitas animi Tui reddit insolubiles. Atq; eādem hāc virtute effectum est, ut non Urbem modò, sed omnia etiam jura ejus salva esse volueris. Nescivit bonitas Tua partiri beneficia; totam sibi restituisti, ut totam se denuo Tibi deberet. Non autem arctius illam Tibi obligare potuisti quām cum, ut ante fuit, immūnem esse iussisti. Fidisimum in subditis vinculum animo-

rum est libertas. Neq; ulli imperio libentius quisq;  
paret, quam sub quo suus esse potest. Quanquam,  
ut omnis felicitatis, ita libertatis etiam nonnunquam  
abusus subire solet. Et sœpè nimirum sibi permit-  
tunt, quibus multum licet; ipsiusq; tandem liber-  
tatis vitiis non in servitutem modò, sed in perni-  
ciem ruitur. Tu liberrimæ Nationis Rex, tametsi  
exundantis subinde libertatis æstus, magno & Tuo,  
& Reipubl. periculo, novissimè expertus es, neimi-  
nem tamen gentilitio hoc bono exuis. Scilicet u-  
numquemq; jam tandem malis domesticis satis edo-  
ctum credis, libertatem generoso equo similem  
esse, qui, si fræna excutiat, & se & sessorem cur-  
ruimve, cui junctus est, rapiat in præceps. Sed si  
modestè ea habeatur, nihil esse in mundo generi  
humano vel gratiüs, vel utilius. Nostrum cer-  
tè Regnum, nullâ magis re, quam libertate ad tan-  
tam molem, & ad tantæ potentiæ florem pervenit.  
Hoc enim maximè illico invitatae gentes vicinæ  
lubenter olim cum regno coaluérunt; & vi aliquâ  
avulsæ, eidem semper optarunt reþungi. Urbs  
quoq; ista, cum multis lœtandi jam habeat causas,

hanc

## RECUPERATUM

51

hanc habet potissimum, quod benignitate Regia, & Regno, & pristinæ libertati restituta est. Ac merito Tullium sibi optat, qui tantam clementiam dignis efferauit encomiis. Olim Rex ille eloquentiæ Romanæ gratias Cæsari egit, cum is M. Marcello ignorisset. Sed Cæsar viro uni ignovit, tali præterea viro, qui olim æqualis ipsi, atq; etiam, cum Consulatum, validâ adhuc Republicâ, gereret, superior fuerat: qui præterea, si Cæsarem offenderat, patriæ, & libertatis amore credi poterat offendisse. Ignovit porro absenti, ignovit quieto, & nihil jam amplius hostile molienti; ignovit deniq; cum non tantum frater pro fratre supplicaret, sed & totus surgens Senatus interponeret preces. Rex vero noster multitudini hominum ingenti, multitudini subditæ, & jurejurando sibi obstrictæ, multitudini unâ cum Capitibus suis sub alterius potestatem, & ad arma adversus legitimum Dominum, tandemq; hinc in extrema omnia prolapsæ, ultrò, nulloq; prorsùs deprecante, plurimis imò ultionem nimis quam acerbè flagitantibus, veniam dedit. De qua postquam per Cancellarios certa jam Vrbs esset,

delecti ex Magistratu, & Civibus, venerunt in ca-  
strâ, & præeunte Seniore & Majorum suisq; meritis  
Aulæ Polonicæ notissimo Præ-Consule JOANNE  
PRUSSO, adversa omnia , quæ necessitas ex-  
torsisset, deprecati, pro clementiâ Majestati Regiæ  
gratias egere. Benignè excepti sunt, nec nisi pa-  
ternè admoniti eorum, quibus Regia Majestas ha-  
ctenùs sit offensa. Exin præsidium, quod ex ter-  
mille hominibus in quadringentos, eosq; magnam  
partem ægros redactum erat , à Gubernatore  
B I L O V I O, Skittio, Draco , Hammiltono ,  
Zögio, Boko, Tribunis & Pro-tribunis propriid.  
Cal. Januar. eductum est. Egressus etiam , insi-  
gni gratiæ Regiæ documento, BENEDICTUS  
OXENSTIERNIUS Comes , & hoc bello à  
Rege Sueciæ Palatinatui Culmensi præfectus. His  
præsidium Regium , cuius pars, jam ante, secun-  
dum pacta, portam unam urbis infederat, sub re-  
gimine Castellani Camenecensis CHRISTO-  
PHORI GRODZICII, ductu autem PAULI  
CELLARII, Generalis jam excubiarum Magi-  
stri, successit. Neq; enim custodiæ sui Vrbs visa  
est

est sufficere, præsertim bello usq; intra Prussiæ vi-  
scera sæviente. Nam etsi armorum suspensiō a-  
gitari cooperat, ea tamen per gravitatem conditio-  
num, & quod Confœderatos offensura videbatur,  
caruit successu. Interim de pace perpetuâ jamdu-  
dum placuerat aliqua institui tentamenta. Eam-  
que ad rem Rex Serenissimus ipsam hanc Urbem  
novissimè recuperatam Illustrissimis & Excellen-  
tissimis Delegatis suis, Magno Regni CANCEL-  
LARIO, & PALATINO POSNANIEN-  
SI, Magni deniq; Ducatûs Lithvaniæ Vice-CAN-  
CELLARIO, assignavit, invitatis eodem Con-  
fœderatis suis, quos belli necessitudine secum so-  
ciatos, negotiatione pacis nefas putat Polonia à se  
disjungere. Votum est omnium bonorum, ut res  
prospere cedat, utq; Urbs, quæ prima, hoc bello,  
armorum hostilium in Prussiâ sedes fuit, felix tan-  
dem sit pacis officina. Cæterum ubi Calendæ  
Januariæ illuxissent, S. Regia Majestas, splendido  
Senatorum præsentium, & aulico comitatu, præ-  
viis equestribus turmis Urbem, inter armatos Ci-  
vium ordines ingressa, rectâ ad templum S. Johan-

nis procescit, comitante eodem Serenissimâ REGI-  
NA. Excepit venientes ILL. JOANNES KOS  
Episcopus Culmensis. Mox sacra ritè peracta.  
Deoq; hymnus pro victoriâ cantatus, Musicis tem-  
pli organis non intesonantibus, quia hostili de-  
structa violentiâ jamdudum obmutuerant. Ex  
Templo in Curiam itum est, ubi Magistratus Ur-  
banus novo sacramento fidem Majestati Regiæ  
obstrinxit. Quod idem postridiè Cives congre-  
gati in foro fecrē. Postea pauci dies extracti  
sunt, ordinandis rebus pace belloque necessariis, a-  
nimisq; hostium, quam serio ad pacem inclinarent,  
pertentandis. Sed apud hos omnia & intricata  
tum nimis, & infra votum deprehensa. Regē vero  
alia negotia, & in primis Comitiorum habendorum  
cura Varsaviam, Magnum quoq; Mareschallum  
instans cum exercitibus super stipendiorum solu-  
tione Commissio Lublinum vocabat. Itaque &  
Aula, & Militia omnis discessit, relictis præsidii,  
quæ cohibendis quidem cohortibus Hostis in  
Prusiam tum stabulantibus, non item novo exerci-  
tui aliunde venturo, sufficiebant. Sed quæ po-  
stea


steā contigerunt , quæque alia in hâc narratione o-  
missa sunt, historicorū labor suo tempore narrabit.  
Ego jam ad Regem Regum & Dominum Domi-  
norum me converto. Nihil enim omni hoc di-  
ctionis nostræ conatu egero, nisi illius clementiæ,  
id quod ante omnia, sub hoc novi anni auspiciū,  
propositum fixumq; habui, quæcunq; animi grati  
anathema suspendero. Ejus beneficio Rex Se-  
renissimus, in hoc insigni ætatis suæ climacterè, tot  
gravissimos togæ sagiq; labores, tot objectas dif-  
ficultates, tot aeris injurias, illæsâ superavit valetu-  
dine, annumque ipsum illustri victoriâ obsignavit.  
Ejus beneficio Serenissima Regina, ut vitæ socia,  
sic laborum Regiorum comes, inconcussum cor-  
poris animiq; vigorem experitur. Ejus benefi-  
cio Illustrissimus Poloniæ Senatus, inclytusq; Nobि-  
litatis ordo, atq; adeo Respubl universa, ex fatali  
illâ calamitatum congerie respirare cœpit, hostium  
aliis debellatis, aliis conciliatis, aliis in diversa ter-  
rarum bellorumq; distractis. Ejus beneficio ma-  
gnanimi Duces militiæ, ipsiq; exercitus matri Rei-  
publ, etsi jam exsuccæ, & in stipendia ægrè suffi-  
ciem.


cienti, promptissimam tamen, fidamq; operam  
navarunt, patriæque decus longè extrà fines ma-  
gnificè protulerunt. Eundem Deum Optim.  
Max. veneramur supplices, ut Pietati, omniq; Vir-  
tuti vigorem, atque accrementum, Regiæ Majes-  
tati utrique longævam & omnigenâ prosperitate  
cumulatam vitam, Senatui saluberrima consilia, Du-  
cibus fortunatam militiam, vigilemq; necessariæ  
disciplinæ custodiam, Nobilitati moderatos ac con-  
cordes animos, Exercitibus alacre ad nobiles ope-  
ras obsequium, Urbibus redivivum artium & com-  
merciorum florem, agris quietæ fertilitatis uber,


Regno universo Aquilæ juventam, & pristi-  
nam ex felici rerum successu Majestatem,  
donet, augeat, conservet.


F I N I S.











Biblioteka Jagiellońska



stdr0013651

